

CONSIDERAZIÒN ED VETTA ATTUÈL

Poesia dialettale

di Marco Sammarchi

Quand ai'era zòuven, quanti còs a vleva fèr, come a pèns tant'etèr come mé; ma a chi tèmp, i mezz a disposiziòn i'erén quì chi'erén e tant progett ién avanzè dànter a qal vecc'casatt ed qal mobil ormai tott sbusanè dai tarù.

Incù, che al cundiziòn ed vetta agl'ién migliorè ed dimondi, am ziga al còr sentèr e vaddèr che tantessom ragazz i sprechén la sò ziventò, i la boccian vù adiritura e brisa sòul qualla: i cazén vù la vetta come gninta foss, solamént par di zugh stoppid!

Am pèr che i zuvéin incù in seppén piò bon ed divartiress, parché con totti qal cumditè a sò disposiziòn, i veinén ciapè da la noiia e i strolghèn ed fèr al còs piò impensabil e madornèl: der fugh a di casunett dal rosch, taièr i cupartòn del machin in sosta, perpetrèr un furt o una rapèina, (da ragazz ed dagg' o tragg'ann) violentèr una ragàza in branch come i lòuv affamè, drugheress par sentress di leòn, par fèr del guer urbèni e del scazzutè dànter e fòra dal stadio sànz incionna rasòn, organizzèr e partezipèr a del gâr in automobil, patintè ed frasch, con al relativ consequènz, in quant incù al machin al van tròpp fòrt e la còsa piò bestièl ed totti, causèr la mòrt par sé stess e par i su amigh spettatur che i stàn a guardèr ai lè dla strè; ma s'an si mett un freno, piàn piàn i zuvéin i dventén una ràza in vù d'estinziòn!

Sprechèr acsé la ziventò e la vetta, l'é 'na còsa che am ratresta am demoralezza, in quant sti zuvéin, dimondi probabilmènt, in san brisa che a sté mond, an'esèst una somma tant granda da psèir paghèr al piò bèl period dla vetta d'una persòuna.

La vetta l'è fàta acsé. Indrì an s'pòl brisa turnèr par cambièr tanti del còs fàti e quand ed spieggh ai ragazz muderén, con tant ragiunamènt, qualla ch'l'é la sò furtòuna, (qualla ed vivèr al sò piò bèl mumènt dla vetta) ban ch'la vâga ed ciap dal defizèint!

Alòura in sté mond, in dov ogni dé bisaggna corrèr sàmper piò dlòngh par inseguir al benesèr e la ricazza, (o IL VIL DANARO, come al dseva òn) i cunselli d'un'anzian in riescén brisa ad equiparèr ai ragiunamènt d'un zòuvéin. Acsé, pensand a tott quall ch'al suzed tott quant i dé, a mé zànt, **"am ziga tant al còr!"**



“am ziga tant al côr!”

Zèrudela di pinsir,
qui d'incù e qui d'a ir.
Avànd passè l'ànta,
la strè pistè l'è tanta,
adesi o col fiè gross,
zarcànd d'evitèr al foss.

Anca mé, da ragazèl,
andeva “a vòul d'usèl”;
adess, a fagh manca strè
quand mell còs a vleva fèr.

Incù, am vén da pensèr
che tant zuvé, come mé,
i vlessén, tott quant i dé,
arvultèr al mònd intir;
ma zert, sòul con al pénsir!

Tott i dé in bulatta
e qal pòch dla pagatta
(fortunè chi l'aveva)
quesi mai l'an basteva
par chi puch divertimènt
ch'ai'era in chi mumènt.
Adess, l'é un'etèr quèl;
ban o mèl un ragazèl
l'ha a sò disposiziòn
da spandèr, un quelch miliòn
da investir in dòu rôd
oppur, int un'etèr môd.
Apanna ch'lé patintè,
una machineina usè
e po' vî dlongh cm'è un razz
a sfidèr tott chi ragazz,
parchè la sò machinatta
la n'è brisa 'na “caratta”
e la pôl venzèr ed sicur:





ma po', BOM, contr'a un mur!

<PREMI STRAORDINERI !>

Un bèl bus al zimitèri
e acsé int un mumènt,
vent'ann cazé vî, al vènt!

Come tutt i omén viv
a sèn sté di impulsiv
ma incù, par la miseria,
la còsa l'as fà seria.

Ed sté pass la zoventò
in pôch tàmp l'an'esèst piò
e se ai tach a pensèr
al còr as mett a zighèr
e quand ai'ho l'uccasiòn,
brisa ed fèr un sermòn,
ma con suquanti paròl
spieghèr a un ragazòl
che vivèr l'é impurtant;
stèr in mezz a la zànt,
avèir d'i'amigh, l'ambròusa.

La vetta l'é prezziòusa
e con puch sacrifezzi,
sànza fèr di stravezzi,
pr'al futur, int al sò dman
al prà dvintèr un'anzian.
Ma al zòuvén l'ha furia,
ai pram piò la lussuria;
lò al n'ha tàmp d'ascultèr
i cunsèi che t'ai vu dèr
e, zertamènt int un spell,
ed pu ciapèr dl'imbezell!

Zòuvén, ma t'an'é capé
ch'an'esèst università
ch'l'insaggna l'esperienza,
che l'é la piò gran sciènza
che òn al possa imparèr?
Basta ch'al possa campèr,
che la vetta l'é tant bèla,
toc e dai, la zèrudela!

